

1 Timotiu

Paru hã Timotiuhu ma, te te ĩrob'ui'ééré na'rata zé Ĩbaihã wasu'uzé

Ã ĩbaihã na Paru hã aibã ĩprédupté ma, ma tô rob'ui'ééré, Timotiu na ĩsisi ma. Ta hã ĩsazei'wa. ĩmama hã deredu, zudezu'õ. ĩna si zudezu hã. Paru hã 'Re ĩhâimana u'âsi mono zadawa wasu'u na te te dama 're rowasu'u mono da, zahadu daro mono bâ 're morĩ ré, ma tô Timotiu hã ĩsiré 're mo. Tawamhã Paru hã timorĩ na te te uzusi da, Épézu hawi watobro wamhã, Timotiu hã te tame ĩsa'u nhamra. Tawamhã tame zahadu sãmra ré, ma tô ã ĩbaihã na rob'ui'ééré hã Paru hã tâma time.

1-2 ĩ'ra Timotiu, wa hã Paru, Cristu Zezusihi zadawa wasu'u'wa, wa ãma aima rob'ui'ééré. Wanhib'apito wasu'uwẽ na te ãma aipo're pu'uzéb zarina, ĩsazei'wa oto 're aimorĩ wa, wa ĩ'ra na asisi. 'Re ĩhâimana u'âsi mono hã Wanho'reptui'wa hã ma tô ĩpisutu, te dama 're sadawa wasu'u mono da. Taha da, ma tô Cristu Zezusihi zama ĩpisutu. Ôhõ zô si, wa sô 're wanhimipari za'ra, marĩ ĩwẽ uptabi hã te te wama ĩpisutu za'ra zéb zarina, te te wama ãma 're a'uwaimrami mono da.

Wamama ma, wa ai'ãma 're ĩmreme u'âsi, 'Re ĩhâimana u'âsi mono ma, duré Wanhib'apito Cristu Zezusihi ma zama, ĩsimizawizé hã ai'ãma 're hâimana u'âsi mono da, duré ai'ãma 're pẽ'ézé u'âsi zahuré mono da, rowẽ u'âsi, ãma 're aimorĩ da.

³ Masédoniza na danhipti'a nho'õmo nhisi u ãmorĩ u'âbâ, wa tô ai'ãma ropti, Épézu ãma a'â asãmra da. Tane da, wa za duré ãzadawa na aima ãma sahu, tame a'â asãmra da. Tame ni'wam norĩ hã te ãsazei'wa norĩ ma, siwa'ru te te 're rowasu'u za'ra. Taha wa, te za a'â tame asã, sadawa uwati za'ra da, tinhimirowasu'u hã te te sahãri pese za'ra da.

⁴ Ta norĩ hã te dahi'rata norĩ nhimirob'rãzarõtõ 'ratatare hã te te 're 'madâ'â za'ra. Dahi'rata sidâpâsi dahi'rata nhisi wasu'u zama, te ta norĩ hã te te 're 'madâ'â za'ra. Taha zarina, te ãma 're dasisada'âbâ za'ra. ãne wamhã, ta norĩ hã te te 're dapawaptob za'ra mono õ di, Wanhib'apito zazei'wa norĩ 're hãimana wẽ za'ra mono da.

⁵ E marĩ da, wa tô ãne hã aima waihu'u. Wa tô ãsima aiwẽ, ãsazei'wa norĩ hã 're pawaptob za'ra mono da, Wamama zawi pese 'wa 're nomro mono da, dazawi pese 'wa zama. ãsazei'wa norĩ hã simirosa'rata wẽ ré si, te za 're nomro. ãne wamhã, marĩ te te 're ãmanharĩ wasété za'ra mono na, 'rãwi 're siwẽ'õ za'ra mono õ di za. Wanhib'apito zazei uptabi 'wa, te za 're nomro. Tawamhã te aima ãwaihu'uzéb zarina 're nomro mono wamhã, te za tô dasisawizé hã ãpẽ'ẽ 're tãma 're hãimana za'ra.

⁶ Ni'wam norĩ hã te aima ãwaihu'uzéb zarina, 're nomro mono õ di oto. Roti sena hawi, ma tô aipizari za'ra. Taha wa, te taré marĩ ãpire õ na si ãma 're sisada'âbâ za'ra.

⁷ Ta norĩ hã te te sima 're wẽ za'ra, 'Re ãhãimana u'ãsi mono nhimiroti 'rata na rob'ui'éré na dama rowahutu'wa, 're nomro mono da. Tane nherẽ, tãma waihu'u pese za'ra õ di, ãsimiroti hã. Tãma

waihu'u pese za'ra newa, tazahã tãma pibu prã za'ra di, te te dama 're ĩrowasu'u za'ra mono zé hã.

8 'Re ĩhãimana u'ãsi mono nhimiroti hã, Mozési te te dama 're ĩ'awaihu'u mono hã wē di, da te dama ãma 're ĩroti za'ra mono zéb da hã. Āne wama waihu'u pese za'ra di.

9-10 E 're ĩnomro wē mono norĩ ma, rotizéb da, te 're hãimana, Wamama nhimiroti hã. Mare di. Roti wē wē'õ'wa norĩ ma, rotizéb da, te 're hãimana. Duré rob'manharĩ wasété'wa norĩ ma zama, rotizéb da, te 're hãimana. Duré 'Re ĩhãimana u'ãsi mono nhimiroti wē'õ'wa norĩ ma zama, rotizéb da, te 're hãimana. Duré ĩwasété norĩ ma zama, rotizéb da, te 're hãimana. Duré 'rãwi pesere dasisô 're ĩda'a're nhi'oto za'ra mono norĩ ma zama, rotizéb da, te 're hãimana. Duré uburé romhuri Wamama te hã, te te ãma 're ĩwasété za'ra mono norĩ ma zama, rotizéb da, te 're hãimana. Duré timama te te 're ĩsimroi mono norĩ ma zama, rotizéb da, te 're hãimana. Duré tina te te 're ĩsimroi mono norĩ ma zama, rotizéb da, te 're hãimana. Duré dapãrĩ'wa norĩ ma zama, rotizéb da, te 're hãimana. Duré dahãiba na da'ãma 're ĩsipsaihuri za'ra mono norĩ ma zama, rotizéb da, te 're hãimana. Duré aibã si'uiwa dasina 're ĩdanhipsaihuri za'ra mono norĩ ma zama, rotizéb da, te 're hãimana. Duré ĩwada'uri zarina si pawa'ãbã ãna dama romhuri'wa da, a'uwē hã da te dasiwi 're ĩsimi'uri za'ra mono norĩ ma zama, rotizéb da, te 're hãimana. Duré 're ĩsadawa nhipese za'ra mono norĩ ma zama, rotizéb da, te 're hãimana. Duré timreme hã tô sena na dama 're siwasu'u za'ra mono nherē, taré te te sina 're ĩroti za'ra mono norĩ ma zama, rotizéb da, te 're hãimana. Duré roti tô senai'õ na siwa'ru, ãma 're ĩdanomro wasété mono norĩ ma zama, rotizéb da, te

're hâimana, 'Re ãhâimana u'âsi mono nhimiroti hã.

¹¹ Roti tô sena na si, wa tô te dama ãma 're aroti, Wanhib'apito wasu'uwẽ na te dama 're rowasu'u mono wamhã. Wẽ uptabi di, Wanhib'apito wasu'u hã. Taha da, ma tô ãma pisutu, ãwasu'uwẽ na te ãma 're da'apo're pu'u mono da, 'Re ãhâimana u'âsi mono hã, rowẽ u'âsi 're ãmorĩ hã.

Paru hã Wanhib'apito ãma ãwatazém na rowasu'u

¹²⁻¹³ ãhãna wa za ãma ãwata, Wanhib'apito Cristu Zesusihi ãma hã. Ta hã ma tô ãwaihu'u siro, ãnhimiromhuri hã za te tãma ãma 're ãuwaimrami mono na hã. Taha zarina ma tô ãpisutu, dapawap-tom na te tãma 're romhuri mono da. Taha da, ma tô te te 're ãnhiptete u'âsi. Taha wa, wa za ãma 're ãwata u'âsi, ãma 're rowẽ mono wa. Wanhib'apito ãma wa tô aré te ãma 're wasété aré, ãmreme wasété na. ãsazei'wa norĩ hãiba u'ãbã, wa tô aré te tãma 're rob'manharĩ wasété. Ta norĩ hãiba u'ãbã, wa tô aré sada 're ãzahi. Wanhib'apito hã Danho'reptui'wa na 're ãmorĩ na hã ãma waihu'u õ di aré. Te duré sazei õ di aré. Taha wa, zahadu ãnhimiza'rese ãna 're ãmorĩ wa, ma tô ããma tipẽ'ézé, 'Re ãhâimana u'âsi mono hã, te te ãazãri tõ da.

¹⁴ Wanhib'apito hã tinhimizawi pese zém na ma tô ãpawapto pese, te saze da, duré dazawizéb da, ãma hãimana da. Aihĩni Cristu Zesusihi ãma 're ãhâimana za'ra mono norĩ hã te te 're ãpawapto za'ra mono ne, ma tô ãpawapto duré.

¹⁵ Ti'ai u ma tô wei mo, Cristu Zesusi hã, 're ãdanomro wasété mono hawi te te 're da'anho'reptui mono da. ãne te dasima da te 're rowasu'u za'ra. Danhimirowasu'u hã tô sena

wamhã, aihĩni ãma 're ĩdasisaze za'ra mono da hã, ĩma wẽ di. Wa hã dawasété nhipai u, ĩwasédé hã sa'ětẽ di.

¹⁶ Tane nherẽ, ma tô ĩ'ãma tipẽ'ězé, te te ĩ'azãri tã da, 'Re ĩhãimana u'ãsi mono hã. E marĩ da. Cristu Zezusi hã ĩ'ãma wa'a su'u õ wa, da'ãma ĩwa'a su'u õ na, da te ãma 're waihu'u za'ra mono da, za ĩza'u da te dasina 're ĩ'umnhasi za'ra mono norĩ hã, ĩ'rata 're dahãimana u'ãsi za'ra mono da, rowẽ u'ãsi ãma.

¹⁷ Taha wa, Danhib'apito uptabi ãma si wa za 're wawata u'ãsi za'ra. Ta hã Apito u'ãsi te dama 're sãmra, ĩdã'ã õ hã, ni'wa hã niwa te te ĩ'madã'ã õ hã. Õhõ si Danhib'apito uptabi hã, 'Re ĩhãimana u'ãsi mono hã. Wẽ uptabi wa, wa za ãma 're wawata u'ãsi za'ra.

¹⁸⁻¹⁹ Duréi pese hã ma tô ni'wam norĩ hã Wamama zadawa hawimhã marĩ na aima rowasu'u za'ra, za tãma asimiromhuri na ĩwaihu'u sirõmo zéb da. Taha zarina ĩ'ra Timotiu, wa za aima ti'ru, da te aima ĩwaihu'uzé hã asina 're 'madã'ã u'ãsi mono da, roti tô senai õ da, ãma 're 'wapéi u'ãsi mono da. ãne te za 're aimo, ãma 're 'wapéi u'ãsi mono da. Roti tô sena si te za 're ĩ'madã'ã pese mo, Zezu Cristuhu wasu'uwẽ hã wa te 're ĩsaze za'ra mono zép si. Te za duré 're aimorĩ wẽ. ãne wamhã, aiwasété õ wamhã, 'rãwi 're asisãmri mono õ di za, aiwasété na. ãhãna ni'wam norĩ hã tiwasété na 're sisãmri za'ra mono nherẽ, 're siwẽ'õ za'ra mono õ di. Taha wa, ma tô oto sazei utõrĩ za'ra, Wanhib'apito nhimiroti hã wa te 're ĩsaze za'ra mono zé hã.

²⁰ ãne Imenezu norĩ hã te oto 're tineb zahuré, Aresãdirihi me. Taha wa, wa tô a'ã tãma hãiba za'ré zahuré, Satanasihĩ ma, robzei'õ hã a'ã te te sina

waihu'u zahuré da. E marĩ da. Roti tō sena upana te te dama 're rowasu'u zahuré mono tō da, taha u'âbâ te te 're wě'ō zahuré mono tō da, 'Re ãhâimana u'âsi mono hã.

2

'Re ãhâimana u'âsi mono ma, 're ãdamreme zusi mono zém na rowasu'u

¹ ãhãna marĩ ãpire na wa za aima rowasu'u. 'Re ãhâimana u'âsi mono ma 're damreme zusi mono wamhã, te za uburé da'ãma tãma 're damreme zusi, te te 're da'apawapto mono da. Marĩ zô dawi 're rowaptâ'ã za'ra mono wamhã, uburé dama te za da te tiwi 're rowaptērẽ za'ra, marĩ hã te te dama 're anhomri mono da. Duré marĩ na dama 're sôpru mono wamhã, te za ãma 're dawata za'ra.

² Danhib'apito mono bâ, dama 're ãhâimana za'ra mono norĩ ãma, te za tãma 're damreme zusi, uburé dama ãpire za'ra norĩ ãma zama. E marĩ da. Ta norĩ hã te te dama 're roti wě za'ra mono da, taha zarina 're dasi'wapé za'ra mono õ wa, rowě na dasiré 're wanomro mono da, duré dama 're wahâimana wě za'ra mono da, 'Re ãhâimana u'âsi mono nhimiroti 'madâ'ã sina.

³⁻⁴ 'Re ãhâimana u'âsi mono hã Wa'anho'reptui'wa. Ta hã ma tō te te sima 're da'awě, uburé te te 're da'anho'reptui mono da. Ma tō duré te te sima 're da'awě, aihĩni pese ãsimiroti hã da te 're waihu'u za'ra mono da, ãma 're danomro wě mono da, ãsimiroti hã tō sena uptabi wa. Aihĩni ãma 're wamreme zusi mono wamhã, tãma rowě di. Taha wa, te za wama 're to za'ra.

⁵ Misire hãiwa ãma 're ãhâimana mono si, uburé Danhib'apito uptabi hã. Misire da'ãwisi wě 'wa

Wamama u hã. Ta hã Cristu Zezusi, aibã na 're ãhãimana mono.

⁶ Ta hã ma tô dazada sisõ, uburé te te da'awa'ãbã da. 'Re ãhãimana u'ãsi mono hã bãdã te te ãpisutuzém na, ma tô da'awa'ã. Taha wa, 'Re ãhãimana u'ãsi mono te te sima 're ãda'awẽ mono zé hã, uburé pese te te 're ãda'anho'reptui mono zéb da hã, wa tô waihu'u za'ra ni.

⁷ Ta hã ma tô ãpisutu, ãsadawa wasu'u'wa 're ãhãimana mono da, zudezu'õ norĩ hã te 're po're pu'u za'ra mono da, ãsadawa para, Wanhib'apito wasu'uwẽ na. E marĩ da. Wanhib'apito hã te te 're saze za'ra mono da, duré te te ãma 're sasõmri za'ra mono da, ãsimiroti zarina si 're nomro wẽ mono da, tô sena uptabi wa, ãsimiroti hã. ãzadawa nhipese na aima ãsiwasu'u õ di. Tô sena wa tô aima 're ãsiwasu'u.

⁸ Wa za oto aima waihu'u, te ãsima 're ãda'awẽ mono zém na hã. Aibã norĩ hã nimame 're ãhãimana za'ra mono zé mono bã te za 're mreme zusi, 'Re ãhãimana u'ãsi mono ma. Ta norĩ hã dama 're hãimana wẽ za'ra mono wamhã, te za tãma 're mreme zusi, tãma 're simiwẽ za'ra mono sina, hãiwa u. Te te 're ãda'ruiwapari za'ra mono da hã, mare di. Duré tizadawa na 're ãsi'wapé za'ra mono da hã, mare di.

⁹⁻¹⁰ Pi'õ norĩ hã, aibã norĩ te te sima 're 'madã'ã ze za'ra mono da, dama 're si'uza wamnarĩ za'ra mono õ di za. Duré dama 'madã'ã ze da, 're siséré tété wẽ za'ra mono da hã mare di. Duré tinho'rebzui wẽ na si, sima 're ãsipese za'ra mono da hã mare di. Duré tinhipsisi wẽ na si, sima 're ãsipese za'ra mono da hã mare di. Duré da'uzazé ãwa'ãbã za'ëtẽ na si, 're ãsi'uza za'ra mono da hã mare di. Dama rob'manharĩ wẽ zéb zô si, te za

sina 're sōpré, 'Re ãhâimana u'âsi mono nhimiroti 'madâ'â'wa na 're ãsiwasu'u za'ra mono zéb zarina.

¹¹ ãsazei'wa norĩ 'madâ'â'wa norĩ hã te te dama 're rowahutu za'ra mono ré, te za pi'õ norĩ hã ari'iwi te te 're wapari za'ra. ã'madâ'â'wa norĩ zapari 're ãhâimana za'ra mono na te za 're si'madâ'â za'ra pi'õ norĩ hã, ari'iwi te te 're ãwapari za'ra mono da hã.

¹²⁻¹³ Pi'õ norĩ hã aibã norĩ ma, te te 're ãrowahutu za'ra mono da hã, mare di. Aibã norĩ ma, timreme pire na 're si'madâ'â za'ra mono õ di za. Ari'iwi te za 're si'ubumro, pi'õ norĩ hã. E marĩ wa, wa ãne aima waihu'u. 'Re ãhâimana u'âsi mono hã ma tô aibã hã poto na'rata, Adã na ãsisi hã. Taha za'u si ma duré pi'õ hã poto, Ewa hã.

¹⁴ Pi'õ si, Wa'uburé nhimiroti hã tô senai'õ na te te waihu'u õ di. Tanei õ di, Adã hã. Pi'õ si Wa'uburé nhimiroti hã tô senai'õ na te te ãwaihu'u õ zéb zarina, ma tô Wamama nhimiroti na upa na'rata.

¹⁵ Tane nherẽ, pi'õi mono bâ hâimana wẽ na 're hâimana za'ra mono wamhã, tãma 're rowẽ za'ra mono di za. Wanhíb'apito umnhasi sina, te za 're hâimana za'ra. Te za duré te te 're dazawi pese za'ra. Hâimana wẽ uptabi na te za dama 're hâimana za'ra. Tawamhã, ãwasã hã ãma 're sépu'u za'ra mono wamhã, ã'ra hã tãma 're rere'e wẽ mono da, te za Wamama hã te te 're anho'reptu, pi'õ norĩ hã.

3

Wanhíb'apito zazei'wa norĩ 'madâ'â'wa na rowasu'u

¹ ã hã te aima ãwaihu hã, tô sena uptabi. Áté ni'wa hã te za sima wẽ, ãsazei'wa norĩ hã te te 're 'mai'madâ'â mono da. ãne wamhã, te te sima

ĩwězé hã wě di, da'madâ'â na te te 're ĩ'mairomhuri mono da hã.

² Ĩsazei'wa norĩ 'madâ'â'wai mono bâ, te za 're hâimana wě za'ra. Tawamhã, ĩwasédé hã da te âma 're ĩsa'ra mono da hã, mare di. Timro uptabi si te za te te sima 're 'madâ'â za'ra, misi haré. Hâimana prédum na te za dama 're hâimana za'ra. Tiwasété wi te za sina 're siptete u'âsi za'ra, 're nomro wě mono da. Te za duré dama 're hâimana wě za'ra. Duré ĩtême 're dasihutu mono wamhã, te za te te 're da'mazasi su'u za'ra. Duré roti na rowaihu hã te za tâma 're hâimana za'ra, te te âma 're ĩdapawaptob za'ra mono zéb da hã.

³ Duré âzézei'wa, 're nomro mono õ di za. Duré da'ahâri zeĩ 'wa, 're hâimana za'ra mono õ di za. Simizawi pese uptabi na, te za dama 're hâimana za'ra. Duré rob'uiirazéb zô si te te sima 're rob'ruiwapari za'ra mono õ di za.

⁴ Ti'ra norĩ hã te za duré te te 're pawapto pese za'ra, timama mreime si te te 're 'madâ'â pese za'ra mono da, timama hã ĩsimiroti na te te 're wazéb za'ra mono da.

⁵ Da'madâ'â'wa norĩ hã ĩ'ra norĩ hã tâma 're nomro wě mono da, te te 're pawapto pese za'ra mono õ nherẽ, e niha te za tawamhã 'Re ĩhâimana u'âsi mono zazei'wa norĩ hã te te 're pawaptob za'ra duré, 're nomro wě mono da, ta norĩ zama. Te te 're pawapto waihu'u za'ra mono õ di za.

⁶ Ni'wa hã Wanhib'apito te te ĩsazézém na âma ronomro õ nherẽ, da'madâ'â'wa na 're 'maihamana mono õ di za. E marĩ wa. ĩsazeté'wa hã da'madâ'â'wa, 're 'maimorĩ wamhã, âté da'madâ'â'wai wa, te za 'râwi sina 're 'maiwata, tipire na taré. Āne wamhã, 'Re ĩhâimana u'âsi

mono hã wa'uburé norĩ nhib'apito hã 'rãwi sina 're wata mono wa, te te ãwẽ'õ ne, te za ta hã wẽ'õ.

⁷ Ìsazei'wa norĩ 'madâ'â'wai mono bâ te za dama 're hãimana wẽ za'ra. Æne wamhã, dama 're ãhãimana wẽ mono zém na te za Ìsazei'õ'wa norĩ zama te te dama 're wasu'u wẽ za'ra. Dama 're hãimana wẽ za'ra mono õ wamhã, te za damreme hã te te sina 're 'rã'õtõ za'ra. Æne wamhã, wa'uburé norĩ nhib'apito te te da'ãma sima ãroti wasété zé hã te za te te sina 're 'mai'uwaimrami tãma, da'madâ'â'wa norĩ hã.

Dapawapto'wa norĩ wasu'u

⁸ Dapawapto'wai mono bâ te za 're hãimana wẽ za'ra. Duré âzézei'wa na 're hãimana za'ra mono õ di za. Rob'uiprazéb zô si mreme si'ahã na 're hãimana za'ra mono õ di za.

⁹ Wanhib'apito nhimiroti hã aré dama sa'rese õ nherê, ma tô oto te te dama 're awaihu'u, 'Re ãhãimana u'ãsi mono hã, da te ãma 're Ìsaze za'ra mono zéb da hã. Ìsimiroti hã tô sena wa, te za dapawapto'wa norĩ hã te te 're 'madâ'â pese za'ra, hãimana wẽ sina. Ìwasu'uwẽ hã tô sena na te za te te 're saze za'ra. Æne wamhã, 'rãwi tipê'ẽ na 're siwẽ'õ za'ra mono õ di za, tô sena na te te 're Ìsaze za'ra mono õ na hã.

¹⁰ Dapawapto'wa da, da te dasiwi pisutu õ ré hã, te za a'â da te dasiwi 're 'mai'madâ'â, dama 're ã'maihãimana wẽ mono zô. Tawamhã dama 're 'mai'ãhãimana wẽ mono wamhã, te za oto dapawapto'wa na 're 'mai'ãhãimana.

¹¹ Ìmro zama te za dama 're hãimana wẽ, pi'õ hã. Damreme hã ãwẽ'õre na te te dama 're robzanhãri mono õ di za. Hãimana prédup sina te za

dama 're hâimana. Tiwasété wi, te za sina 're siptete. Hâimana nhiptete na, te za 're hâimana.

¹² Dapawapto'wai mono bâ timro uptabi si te za sima te te 're 'madâ'â pese za'ra, misi haré. Duré ti'ra norĩ hã te za te te 're 'madâ'â pese za'ra, 're nomro wẽ mono da. Duré uburé ãsõrõwa ãma ãsiré 're ãhâimana za'ra mono norĩ zama, te za te te 're 'madâ'â pese za'ra, ta norĩ zama 're nomro wẽ mono da.

¹³ Dapawapto'wa norĩ hã te te 're dapawapto wẽ za'ra mono wamhã, ãsimipawapto wẽ na te za da te 're wasu'u wẽ za'ra. ãne wamhã, mreme nhiséb ãna te za duré dama 're siwasu'u za'ra, Cristu Zezusi hã te te 're ãsaze za'ra mono zém na hã.

Wanhib'apito wasu'uwẽ hã dama ãsahãiréze wasu'u

¹⁴⁻¹⁵ Atême ãma ãwisi su'u da hã ãma wẽ nherẽ, ãma ãwisi su'u õ na dâ'ãsina, wa ãne na ãma aima rob'ui'ére. E marĩ da. Niha dama 're ãwahâimana za'ra mono zéb da na waihu'u da. Wa norĩ hã 'Re ãhâimana u'ãsi mono 'ra, wa 're wanomro. ãsib'a'uwẽ, wa oto 're wahâimana za'ra, daro mono bâ wa te 're ãsaze za'ra mono hã. Wanhib'apito nhimiroti hã tô sena wa, ãsazei'wa mono bâ wa za wa te 're 'madâ'â u'ãsi za'ra. Õne haré te za dama 're hâimana u'ãsi, da te ãma 're ãsaze za'ra mono zéb da hã.

¹⁶ Tô sena Zezu Cristuhu wasu'uwẽ hã wẽ uptabi di, aré dama sa'rese õ nherẽ, Wamama hã te te oto dama ãhãiré hã wa te 're ãsaze za'ra mono zé hã, ãma 're ãwanomro wẽ mono zéb da hã. ãne te te dama ãwaihu'uzé hã:

“A'uwẽ na ma podo, ti'ai ãma.

Duré tô sena ã'ra 're ãmorĩ wě uptabi na, ma tô Tipě'ěžani na dama waihu'u za'ra.

Duré hãiwa ãma 'Re ãhãimana u'ãsi mono ma romhuri'wa norĩ hã ma tô titõmo na 'madã'ã za'ra.

Duré a'uwě mono bã 're ãdahãimana za'ra mono norĩ hã ma tô ãwasu'uwě na da te 're dapo're pu'u za'ra, daro mono bã.

Ma tô duré da te dasina 're umnhasi za'ra.

Duré rowě uptabi u ma tô mo, hãiwa u.”

Ãne Zezu Cristuhu wasu'uwě na Wamama hã te te dama ãwaihu'uzé hã.

4

Danhimiroti senai'õ na rowasu'u

¹ 'Re ãhãimana u'ãsi mono hã, Tipě'ěžani na ma tô ãne dama waihu'u: “Rob'rãsutuzéb u romhuture wapsi, te za ni'wam norĩ hã ãzadawa para õ nherě, rême za'ra, Zezu Cristuhu nhimiroti hã aré te te 're ãsaze za'ra mono zé hã. ãhãiba'õ norĩ nhimiroti hã tô sena newa te za te te 're wapari za'ra, wa'uburé norĩ nhimiroti zarina 're nomro mono da oto.” ãne ma tô dama waihu'u.

² Wa'uburé nhimiroti hã te za te te datěme 're ropé, aibã norĩ zadawa hawi. Aibã norĩ hã roti tô sena na te te dama 're rowasu'u za'ra mono newa, te sadawa nhipese na te te dama 're rowasu'u za'ra. Tane nherě, ta norĩ hã 'rãwi 're siwaihu'u za'ra mono õ di, tizadawa nhipese na hã.

³ Ta norĩ hã te za dasina 're ãdamro za'ra mono zé hã dawi sawi za'ra, dasina 're damro za'ra mono tã da, dasiwaprosi 're dahãimana za'ra mono da. Te za duré dasazé hã dawi sawi za'ra, marĩ mono bã 're dasaihuri tã mono da, 'Re ãhãimana u'ãsi mono hã uburé dasazé hã te te apoto mono nherě, ãma

're ĩdasaihuri mono zéb da hã. ĩsazei'wai mono bã wama waihu'u pese za'ra di, dasazém na ĩsimiroti hã. ãne wa, sõpru wa, ãma 're wawata za'ra mono pari, wa za ĩsimipoto na 're wasaihuri.

⁴⁻⁵ Uburé dasazé hã wě di, 'Re ĩhâimana u'âsi mono nhimipodo hã ãma 're ĩwasaihuri mono zéb da hã. Wě wa, wa te wasiwi 're wě'õ za'ra mono õ di za, ãma 're wasaihuri mono tõ da hã. Sõpru wa, ãma 're wawata za'ra mono sina, wa za ãma 're wasaihuri, ĩwě na te te nharĩ wa, 'Re ĩhâimana u'âsi mono hã. ãne wamhã, tãma wě di, ĩsimipoto na 're ĩwasaihuri mono zéb da hã.

⁶ Tawamhã uburé te aima ĩ'awaihu'uzéb zarina si, te za wasiré ĩsazei'wa norĩ ma 're ĩ'awaihu'u mo. ãne wamhã, Cristu Zezusihi ma, romhuri wě 'wa, te za tõ 're aimo. Wanhíb'apito nhimiroti hã wa te 're ĩsaze za'ra mono zéb zarina, 're aimorĩ u'âsi sina, te za tãma 're ĩwaihu'u u'âsi za'ra mo, roti tõ sena zarina zama, ãma 're aimorĩ u'âsi ne. Õhõ na si 're aimorĩ wamhã, asiptete sina te za 're aihâimana mo, Wanhíb'apito ãma hã.

⁷ Dahi'rata norĩ nhimirob'rãzarõtõ 'ratare hã 're wapari mono õ di za. Ta norĩ hã ĩsazei'õ'wa norĩ te hã, tarére. Ta hã te za asima 're ĩ'madâ'â pese mo, 're aihâimana wě mono da, Wamama nhimiroti zarina.

⁸⁻⁹ ãne wa za duré aima waihu'u. ãté ni'wam norĩ hã te za te te sima 're pisutu za'ra, 're sihâiba wairob za'ra mono da, dahâiba wairobzé hã wě wa, dahâiba ma hã. ãne hã dama 're rowě za'ra mono nherě, 'Re ĩhâimana u'âsi mono nhimiroti zarina 're danomro wě mono da, da te dasima 're pisutu pese za'ra mono wamhã, dama 're rowě uptabi za'ra mono di za. Rowě na te za ãma 're

danomro, ti'ai āma, hāiwa āma zama. Tô sena wa tô aima rowaihu'u. Āhã wasu'u hã tô sena wa, aihĩni te za da te āma 're saze za'ra.

¹⁰ Taha da, wa za sada 're wanhiptete u'âsi za'ra, wa te 're dapawaptob za'ra mono da, da te āma 're saze za'ra mono da. 'Re morĩ u'âsi wa, wa tô wasina wa te 're umnhasi za'ra, te te 're wapawaptob u'âsi za'ra mono da. Ta hã uburé Danho'reptui'wa, te 're hāimana. Īsazei'wai mono bâ te za tô te te 're wa'anho'reptu.

¹¹ Taha wa, uburé te aima ĩ'awaihu'uzém na te za ĩsazei'wa norĩ ma 're ĩ'awaihu'u mo, asimiroti pire sina.

¹² Aihāiba prédu pese õ nherẽ, te za 're aimorĩ wẽ, aiprédu pese õ wa, asimiroti na ĩsazei'wa norĩ hã te te 're aiwẽ'õ za'ra mono tõ da. Te za dama 're asanho mo, aimreme wẽ na, duré dama aihāimana wẽ na, duré asimizawi pese na, duré asimirosa'rata wẽ na. Taha na, te za dama 're asanho mo, asirã zarina 're nomro wẽ mono da, ĩsazei'wa norĩ hã.

¹³ Nimahã na wa za āma atēme wi. Ma'āpé, āma atēme ĩwisi õ ré hã, dama 're sōré u'âsi mono za, 'Re ĩhāimana u'âsi mono nhimiroti 'rata na rob'ui'ére hã. Te za duré Wanhib'apito wasu'uwẽ na dama 're ĩrowasu'u u'âsi mo. Te za duré 're ĩdapawaptob u'âsi mo, ĩsimiroti zarina 're danomro wẽ mono da. Taha da, te za asina 're ĩ'madâ'â u'âsi mo.

¹⁴ Marĩ ĩwẽ hã ma tô Wamama hã aipẽ'ẽ 're aima tisõ, āma 're ĩdapawapto mono zéb da hã. Hāiwa hawi te te tãma ĩwaihu'u za'ra zém na, ma tô ĩsadawa wasu'u'wa norĩ hã aima waihu'u za'ra, ĩwẽ hã za te te aima ĩsõmri na. Duré ma tô da'madâ'â'wa norĩ hã, tinhib'rada hã ai'āma sa'ra za'ra, ai'rã

nhisiwi. Taha ré ma tô 'Re ihâimana u'âsi mono hã ãwẽ hã aima tisõ. Taha zarina, te za asina tâma 're ã'uwaimrami u'âsi mo, dapawaptom na, asimiromhuri hã Wamama ma.

¹⁵ Uburé te aima ã'awaihu'u mono zéb zarina, te za asina 're ã'madâ'â u'âsi mo. Õhõ si te za asima 're ãpisutu pese mo, asina 're ã'uwaimrami mono zéb da si. ãne wamhã, dapawaptom na rowaihu hã asima ãma 're ãsa'ëtẽ mono na te za da te ai'ãma 're waihu'u za'ra.

¹⁶ 'Re aimorĩ wẽ da, duré ã'uwaibaba si dama 're sadawa wasu'u mono da, te za 'rãwi 're asi'madâ'â pese mo. ãne wamhã, te za 're asisõ'reptui u'âsi mo. Aiwapari'wa norĩ zama, te za 're ã'anho'reptui u'âsi mo.

5

ãsazei'wa norĩ pawaptobzém na rowasu'u

¹ ãté aibã ãprédu hã te za tihâimanazém na 'mai'upa. ãne wamhã, aimreme ãpire na tâma nharĩ õ di za. Aimama ma, 're aimreme wẽ mono ne, te za duré aimreme wẽ na 're ãpawapto mo, 're morĩ wẽ da oto. Duré ãpréduptém norĩ hã te za aimreme wẽ na 're ã'apawapto mo, aimreme wẽ na ano norĩ hã 're ã'apawapto mono ne.

² Duré pi'õ ãprédum norĩ hã te za aimreme wẽ na 're ã'apawapto mo, aimreme wẽ na ana hã 're ãpawapto mono ne. Duré pi'õ ãpréduptém norĩ hã te za aimreme wẽ na 're ã'apawapto mo, aimreme wẽ na si aihidiba norĩ hã 're ã'apawapto mono ne. Aiprédup sina te za ta norĩ ma 're aihâimana mo.

³ Pi'õi mrotõ norĩ pawapto'wa da hã ni'wai õ uptabi wamhã, te za marĩ na 're ã'apawapto pese mo.

⁴ Pi'õi mrotõ 'ra norĩ hã 're hâimana za'ra mono wamhã, tiwarahuzé wa'rãmi, te za tina hã marĩ na te te 're pawapto pese za'ra. Duré pi'õi mrotõ nhihudu norĩ hã 're hâimana za'ra mono wamhã, tiwarahuzé wa'rãmi, te za ti'rata norĩ hã marĩ na te te 're pawapto pese za'ra. ãne te za 'Re ãhâimana u'âsi mono nhimiroti zarina te te tãma ãma 're uwaimrami za'ra, ãne si tãma wẽ wa.

⁵ Pi'õi mrotõ hã áté siwaprosi te 're 'manhamra. Ìpawapto'wa da hã, ni'wai õ uptabi di. Tane wamhã, 'Re ãhâimana u'âsi mono zô si, te za 're simnhasi, marĩ na te te 're pawapto mono da. Bâtâ na te za tãma 're mreme u'âsi, barana zama, marĩ na te te 're pawapto mono da.

⁶ Pi'õi mrotõ hãiba amo hã, áté ãne 're 'maihâimana mono õ di za. Áté marĩ zô si te za sina 're simnhasi u'âsi. ãne wamhã, ãpẽ'ẽ 're dá'â u'âsi ne, te za oto 're 'maimo.

⁷ Taha wa, te za tãma 're ãroti pese za'ra mo, ãsazei'wa norĩ ma, ãmrotõ norĩ ãma te aima ãroti mono zé hã te te siwi 're 'madâ'â pese za'ra mono da. Tawamhã ãsazei'wa norĩ hã damreme hã te te sina 're 'rã'õtõ za'ra mono õ di za.

⁸ Áté ni'wam norĩ hã tinhimarĩ na te te 're pawapto pese za'ra mono õ di za, tisisãnawã norĩ hã. Áté ãsõrõwa 're, 're ãhâimana za'ra mono norĩ zama, te te 're pawapto za'ra mono õ di za. ãne wamhã, Wanhib'apito nhimiroti zarina te te 're pawapto pese za'ra mono õ wamhã, te aré ãsazei'õ'wa ne oto 're nomro. ãne wamhã, te te 're ãpawapto za'ra mono õ na, te aré ãsazei'õ'wa norĩ hã 'rãnhipa za'ra, tihâimana wasété na hã.

⁹⁻¹⁰ Pi'õi mrotõ hãiba tém norĩ nhisi na 're rob'ui'ére za'ra mono õ di za, pi'õi mrotõ si'ĩhi norĩ

nhisi zu hã. 60 na ãma 're wahub za'ra mono parip si, te za ĩsisi na da te 're rob'ui'ééré za'ra, ti'amo'aba si te te 're 'madâ'â pese za'ra mono wamhã, duré ti'ra norĩ hã te te 're warahu wẽ za'ra mono wamhã, duré te te 're da'mazasi su'u za'ra mono wamhã, duré dawi 're sipa zawi za'ra mono ãna, ĩsazei'wa norĩ ma, te te 're romhuri za'ra mono wamhã, dapara upsõ na zama, duré robzei'õ na 're ĩdanomro mono norĩ hã te te 're pawaptob za'ra mono wamhã, duré simi'ẽ na te te dama 're 'manharĩ wẽ u'âsi za'ra mono wamhã. ãne wamhã, pi'õi mrotõ norĩ hã dama waihu'u pese za'ra di za, te te 're ĩdapawaptob za'ra mono na, siwaptom na. Tawapsi, te za ĩsisi na da te 're rob'ui'ééré za'ra, pi'õi mrotõ si'ĩhi norĩ nhisi zu.

11 Pi'õi mrotõ hãiba tém norĩ nhisi na ĩhi norĩ nhisi zu, ãma 're rob'ui'ééré za'ra mono õ di za. E marĩ wa. Áté hãiba téb uptabi ré, 're mrotõ za'ra mono wa, te za te te sima 're wẽ uptabi za'ra, timro na te te 're sahu za'ra mono da. Áté Cristuhu ma si te te 're romhuri za'ra mono da, te te sima 're wẽ uptabi za'ra mono õ di za oto.

12 Tawamhã timro na te te ãma 're sahu za'ra mono wamhã, Cristuhu ma, te te sina 're ĩroti za'ra mono zé hã ãma 're nomro mono õ di za oto. Taha wa, áte te za oto da te dasiwi 're wẽ'õ za'ra, ãma 're sõpré u'âsi mono õ wa.

13 Duré pi'õi mrotõ hãiba tém norĩ nhisi na ĩhi norĩ nhisi zu, 're rob'ui'ééré za'ra mono wamhã, áte dawaptom na te za dama 're wa'a za'ra. Áté sihãwi na te za 'ri babap si oto 're nomro, mro õ wẽ te. Áté marĩ te te wapari wamhã, te za te te dama 're rowasu'u za'ra. Áté aimawi timreme na te za te te dawi ãma 're ro'wa'rutu za'ra. Áté marĩ na taré 're

sõpré mono ãna, te za te te dama 're rowasu'u za'ra.

¹⁴ Taha wa, wa tô ãsima wẽ za'ra, duré apâ timro na te te 're sahu za'ra mono da, pi'õi mrotõ hâiba tém norĩ hã. Te za duré apâ 're 'ra za'ra. Tawamhã tinhorõwa ãma te za ti'ra norĩ hã te te 're 'madâ'â pese za'ra. ãne dama 're hâimana wẽ za'ra mono wamhã, damreme hã te te sina 're 'rã'õtõ za'ra mono õ di za, wazawi'õ'wa norĩ mreme hã.

¹⁵ ãne wa tô aima waihu'u. E marĩ wa. Ni'wam norĩ hã ma tô wairé, pi'õi mrotõ norĩ hã, Wanh'hib'apito nhimiroti wẽ nhiti, Satanasih' nhimiroti si te te oto 're 'madâ'â za'ra mono da. Taha wa, wa tô ãne na aima waihu'u.

¹⁶ Pi'õ hã ãsazei'wa 're 'maimorĩ wamhã, te za pi'õi mrotõ hã marĩ na te te 're 'maipawaptob u'âsi, tina wamhã, ti'rata wamhã. ãne wamhã, rosa'rata pire hã pi'õi mrotõ norĩ ãma te te ãma 're sêpata za'ra mono õ di za, ãsazei'wa norĩ hã. Tãma waihu'u pese za'ra di za, pi'õi mrotõ hã 'ra ãna 're ãhâimana za'ra mono norĩ si te te 're ãpawaptob za'ra mono da hã.

ãsazei'wa norĩ 'madâ'â'wai wasu'u

¹⁷⁻¹⁸ Aibã norĩ hã ãsazei'wa norĩ te te 're 'madâ'â wẽ za'ra mono wamhã, te za ãwa'rãmi marĩ ãwẽ hã te te tãma 're sômri za'ra, ãsazei'wa norĩ, siré 're ãsi'rã'õtõ mono norĩ hã. Cristuhu wasu'u wẽ na te te tãma 're rowasu'u za'ra mono wamhã, duré ãsimiroti wasu'u na te te 're pawaptob za'ra mono wamhã, marĩ hã ãwẽ hã sa'ëtẽ na te te tãma 're ãsômri za'ra mono da hã, wẽ di. ãne hã wa tô waihu'u za'ra ni, 'Re ãhâimana u'âsi mono nhimiroti 'rata hawimhã, ãne:

“Powawẽ hã aro 'rã ne tipara na dasazéb da, te te aima 're sub za'ra wa'aba mono ré hã, 're

wata wasisi za'ra wa'aba mono õ di za, 're saihuri tõ mono da.”

Ãne hã, 'Re ãhãimana u'ãsi mono nhimiroti na rob'ui'ére 'rada hã. Duré ãsimiroti hãiba amo hã ãne: “Romhuri'wa norĩ hã te te dama 're romhuri za'ra mono wamhã, tõ ã'uwaibaba te za da te 're pawa'ãbã za'ra.”

Taha zarina te za ãsazei'wa norĩ hã da'madã'ã'wa norĩ hã te te 're pawaptob za'ra asa, marĩ na.

¹⁹ Ãté da'madã'ã'wai ãma te za ni'wa hã ãwasédé hã ãma tihi. Tawamhã, siwaprosi te te ãma hiri wamhã, wapari õ di za, ãmreme hã. Ãté si'ubdatõ te za ãma sisadawa waptob za'ra, ãma ã'madã'ã'wa norĩ hã, ãwapari'wa norĩ hã. Ãté maparane te za ãma sisadawa waptob zahuré. Ãne wamhã, da'madã'ã'wa zõ te za aihã, ãhãimanazém na sadawa pibu da.

²⁰ Tawamhã tõ sena tiwasédé hã te te 'manharĩ wamhã, te za ãsazei'wa norĩ nho'a tãma ãroti, tiwasété na te te ãma sahu tõ da. Danho'a te za tãma ãroti, ãsipai u da'madã'ã'wa hãiba amo norĩ hã sina 're hãtã'ã' za'ra mono wa, ãsine tiwasédé hã te te 're 'manharĩ za'ra mono tõ da, ta norĩ hã.

²¹ Da'madã'ã'wa hã aima sawi uptabi nherẽ, te za danho'a tãma ãroti, tiwasété na te te ãma sahu tõ da. Asimiroti na 're da'mairẽme mono õ di za. 'Re ãhãimana u'ãsi mono hã te we te te 're wa'ab'madã'ã, Cristu Zezusihi me. Hãiwa ãma romhuri'wa norĩ zama, te duré te te we 're wa'madã'ã' za'ra, 're ãnomro wẽ mono norĩ hã. Taha wa, ta norĩ nho'a 're wanomro mono wa, da'madã'ã'wa norĩ ãma te aima ãroti mono zé hã te za 're ã'madã'ã' pese mo.

²²⁻²⁵ Ãne wa za duré aima waihu'u. ãsazei'wa norĩ 'madã'ã'wa da, da'maipisutu da wamhã, asapa'abã

da'maipisutu õ di za, aiwara sina. Asapa'abâ asib'rada hã da'rã nhisiwi 're aza'ra mono õ di za, Wanhib'apito ma, romhuri'wa da, 're da'apisutu mono da. E marĩ wa, wa ãne aima waihu'u. Asimipisudu hã dama 're hâimana wê prã za'ra mono wamhã, ãsabãdã da te dasiwi 're aiwê'õ za'ra mono õ'umnhasite. Te za 'rãwi 're asi'madã'ã u'ãsi mo, asimiroti na duré aihâimanazém na 're upa tã mono da.

Wa za a'ã aima waihu'u, asi'ãma waihu'u da. Å si 're hãsi mono nherẽ, te za oto uwa 'rãi wa'u ãsé hã syry na 're ãhãsi mo, ãma 're asiwede mono da. E marĩ da. 'Re asai mono wa, 're adi'izé u'ãsi tã mono da. Aihãzé hã te te aimrami siwapto wa, asib'uwa na 're aimorĩ wa, te za 're ãhãsi u'ãsi mo, syry na.

Åne wa za duré aima waihu'u, da'madã'ã'wa da, asapa'abâ 're ãda'apisutu mono õ zém na hã za. Åté ni'wam norĩ hã sã'awi tiwasédé hã te te 're 'manharĩ za'ra mono wamhã, ãwasété na dama waihu'u pese za'ra di za, 'Re ãhâimana u'ãsi mono hã bãtã na dahâimanazém na te te da'awaihu'u õ ré hã. Åté nimahã na si te za ta norĩ hã ãwasété na da te 're waihu'u za'ra. Åté ni'wam norĩ hã te te dama 're ã'manharĩ wê za'ra mono zém na, dama waihu'u pese za'ra di za. Åté nimahã na si te za ta norĩ hã da te 're waihu'u za'ra, te te dama 're ã'manharĩ wê za'ra mono zém na. Åne wa, wa tã ãne na hã aima roti, asapa'abâ 're da'apisutu tã mono da, da'madã'ã'wa da hã.

6

¹ ãwada'uri zarina si, pawa'ãbã ãna dama romhuri'wa norĩ hã te za tãtede'wa hã ãsimiroti na te te 're wazéb za'ra. Åne 're hâimana za'ra

mono õ wamhã, ãté te za 'Re ãhãimana u'ãsi mono nhisi na da te ãma 're wasété za'ra. ãté wa'ãma zama te za duré da te 're wasété za'ra, ãsazei'wa norĩ ma, wa te 're roti wasété za'ra mono newa.

² ãté pawa'ãbã ãna dama romhuri'wa norĩ tede'wa hã te za ãsazei'wa 're 'maimo. E tawamhã ãmreme hã te te 're 'madã'ã pese za'ra mono õ di za, ãsisãnawã ne tãma 're 'maihãimana mono nherẽ, ãtede'wa hã. Mare di. ãsimiroti na te za te te 're wazéb za'ra. ãsazei'wa 're 'maimorĩ wa, duré tãma sawi pese za'ra wa, te za titede'wai ma, te te tãma 're romhuri wẽ uptabi za'ra. ãne na te aima 're ãroti mono zéb zarina, te za ãsazei'wa norĩ ma 're ãaroti pese mo, ãma 're nomro wẽ mono da.

³⁻⁵ ãté ni'wam norĩ hã aimawi na te za ãsazei'wa norĩ ma te te tãma 're rowasu'u za'ra. ãté Wanhib'apito Zezu Cristuhu nhimiroti na te te ãma 're saze za'ra mono õ di za, ta norĩ hã, tô sena nherẽ, Wanhib'apito nhimiroti hã rowẽ na ãma 're ãdanomro mono zéb da hã, duré dawẽ na si ãma 're ãdanomro mono zéb da hã. ãne wamhã, roti tô sena hã tãma waihu'u za'ra õ di za. Taré te za tinhimiroti wẽ na 'rãwi sina 're wata za'ra. Ta norĩ ma, wẽ di, marĩ wasu'u na 'rãwi ãma 're ãsada'ãbã za'ra mono da hã, duré 'rãwi timreme na 're ãsi'wapé za'ra mono da hã. Taha zarina, te za tisi'ruiwapari na te te sima ãma 're wa'rãmi za'ra, ãma 're sisada'ãbã za'ra mono da. Te za duré te te 're dawasu'u wasété za'ra. Te za duré si'ãma te te 're rosa'rata wasété za'ra. Roti tô sena hã tãma waihu'u pese za'ra õ wa, roti tô sena zarina si te te 're rosa'rata wẽ za'ra mono õ di za. Ta norĩ hã te te sima 're rosa'rata siwamnarĩ za'ra, ãsazei'wa norĩ hã rob'uiprazé hã te te tãma 're sãmri za'ra mono da, ãsimirowasu'u wa'rãmi, sibro pese na 're hãimana

za'ra mono da.

⁶ Re ãhâimana u'âsi mono nhimiroti 'madâ'â'wa, 're wanomro mono wamhã, duré marĩ zô si wasima 're wanhopré mono ãna 're wanomro mono wamhã, wama 're rowẽ uptabi za'ra mono di za.

⁷ E rob'uiprazé ma tô wazababa 're wairébé, wana dub're hawi 're wapoto za'ra mono wamhã. Mare di. Wa'ubana wa tô 're wapoto za'ra. Duré 're wadâ'â za'ra mono wamhã, e wanhimarĩ hã wa za wasiré wa te 're 'wasari. Mare di.

⁸ Taha wa, ti'ab ré, wasai ré 're wahâimana za'ra mono wamhã, duré wa'uza ré 're wahâimana za'ra mono wamhã, marĩ zô si wasima 're wanhopré za'ra mono õ di za, marĩ na wa te wasima ãma 're ãrowẽ za'ra mono zéb da hã.

⁹ Rob'uiprazéb zô, da te dasima 're rosa'rata siwamnarĩ u'âsi za'ra mono wamhã, ãté te za da te 're wapari za'ra, rob'uiprazém na wa'uburé te te dama 're ã'aroti wasété mono zé hã. ãne wamhã, ãté ãsimiroti hã da te 're rême waihu'u za'ra mono õ di za oto. ãté rosa'rata ãna te za ãsimiroti zarina, marĩ zô si oto da te 're rob'ruiwapari za'ra, marĩ wasété zô zama. ãne wamhã, te za oto dawĩ tãrobzei'õ pese za'ra. Rowẽ u'âsi 're ãdanomro mono zé hã tãma 're hãimana za'ra mono õ di za oto.

¹⁰ E marĩ wa. Rob'uiprazéb zô si, da te dasima 're rosa'rata za'ra mono wamhã, siwa'ru te za marĩ hã ãwasédé hã da te 're 'manharĩ za'ra. Ni'wam norĩ hã roti wẽ hã aré te te 're ãsaze za'ra mono zém hawi, ma tô 're sipa za'ra, rob'uiprazéb zô si te te sima 're rob'ruiwapari za'ra mono wa. Ta norĩ hã te oto robzei'õ si te te 're sépata za'ra.

¹¹ A hã 'Re ãhâimana u'âsi mono ma romhuri'wa. Taha wa, ta norĩ ne 're aimorĩ õ di za. Te za 're

aihâimana wê u'âsi mo, 'Re îhâimana u'âsi mono nhimiroti zarina si. Ôhõ si te za 're î'madâ'â pese mo, 'Re îhâimana u'âsi mono si, ai'âma 're siwãrĩ u'âsi mono da. Te za duré 're îda'azawi pese mo. Rowasédé hã taré da te aima 're 'manharĩ za'ra mono nherê, asiptete sina te za Wanhíb'apito âma 're aimorĩ u'â. Atoi u'âsi te za 're aimo. Taha na si 're aimorĩ da, te za asina 're î'madâ'â u'âsi mo.

¹² A hã Îsazei'wa, 're aimorĩ wa, te za sô 're asi'wapéi u'âsi mo, 're î'aimorĩ wê zéb zô, rowê u'âsi 're aihâimana u'âsi mono zéb da hã, hâiwa âma hã asina uwaimrami da. Taha da, ma tô bâtâ na aipisutu 'Re îhâimana u'âsi mono hã, da'ahâ norĩ nho'a Îsazei'wa na asiwaihu'u wê zém na.

¹³⁻¹⁴ Âhãna, wa za aima pisutu, uburé te aima îroti mono zé hã asina 're 'madâ'â u'âsi mono da. 'Re îhâimana u'âsi mono nho'a, wa aima pisutu, ti'ai âma 're îdanomro mono zé hã te te dama 're î'apisutu mono nho'a. Cristu Zezusihi nho'a zama wa aima pisutu, Pôsi'u Piratuhu ma, tihâimanazém na Îsiwaihu'u wê nho'a zama. Uburé te aima îroti mono zé hã te za asina 're î'madâ'â u'âsi mo, apâ we îmorizéb u, Wanhíb'apito Zezu Cristu hã. Asina 're 'madâ'â u'âsi mono wamhã, tawamhã da te aima 're nharĩ za'ra mono õ di za, asina 're î'madâ'â mono õ zém na hã.

¹⁵ Bâdâ te te Îpisutuzém na te za 'Re îhâimana u'âsi mono hã tâma tinha, apâ wei morĩ da, Wanhíb'apito hã. Wê uptabi di, 'Re îhâimana u'âsi mono hã. Ôhõ si uburé Danhíb'apito uptabi. Uburé ti'ai âma danhíb'apito norĩ nhipai u, pire uptabi di. Uburé dama Îpire norĩ nhipai u, pire uptabi di.

¹⁶ Ôhõ si siwaprosi 're îmorĩ u'â hã. Ta hã, rowa'a za'êtê na te 're hâimana u'âsi. Taha wa, ni'wa hã

ĩtẽme ĩsẽbré da hã mare di. Da te dasiwi ĩhãiba pibu da hã, mare di duré. Ta hã wẽ uptabi di. Waihu'u pese di duré. Taha wa, wa za ãma 're wawata u'âsi za'ra.

17 ãne te za duré ĩsibrob ahã norĩ ma 're ĩ'aroti mo, sibrob ahã wẽ te, 'rãwi sina 're wata tã za'ra mono da. Danhibro hã dama 're hãimana u'âsi za'ra mono õ di za, dama ãma 're ĩrowẽ za'ra mono zéb da hã. Taha wa, tinhibrop si te te 're 'madã'ã za'ra mono õ di za. 'Re ĩhãimana u'âsi mono zõ si, te za 're simnhasi za'ra, taha si, marĩ wẽ na uburé wama 're sõpru mono wa, wama ãma 're ĩrobze za'ra mono zéb da hã.

18 ãne te za duré ĩsibrob ahã norĩ ma 're ĩ'aroti mo, te te dama 're 'manharĩ wẽ u'âsi za'ra mono da. Te za duré uburé marĩ wẽ na dama 're sõprub za'ra. Te za duré simi'ẽ na marĩ na te te 're dazari u'âsi za'ra.

19 ãne wamhã, ĩte uptabi da hã te za marĩ hã ĩwẽ hã sã 're simi'wara u'âsi za'ra, niwab da hã. Duré rowẽ u'âsi te za ta norĩ hã 're hãimana u'âsi za'ra, hãiwa ãma.

20-21 Timotiu, ma'ãpé roti hã tã sena si asina 're 'madã'ã u'âsi mono za, 'Re ĩhãimana u'âsi mono te te aima ĩwaihu'uzé hã, ãma 're ĩda'apawapto mono zéb da hã. Ni'wam norĩ hã taré te dama 're siwasu'u za'ra, roti tã sena hã tãma ĩwaihu'u za'ra na hã. Tane nherẽ, Zezu Cristuhu nhimiroti hã wa te 're ĩsaze za'ra mono zém hawi, ma tã ta norĩ hã 're sipa za'ra. Ta norĩ hã te te dama 're ĩrowasu'u za'ra mono zé hã, Wanhib'apito nhimiroti zarinaĩ õ di. Taha wa, roti tã senai'õre wi, te za asina 're asiptete u'âsi mo, 're wapari tã mono da.

Wa ĩsima aiwẽ za'ra wa'wa, rowẽ u'âsi 're anomro aba mono da, Wamama te te 're

Ī'aipawaptob za'ra wa'aba mono zéb zarina si.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

744f0b3a-210f-53c7-b3a1-39b62617ba0c